

COMUNANZA

## La tradicions de Pèsca Tofènia e i Trei Rees

*I neves tempes e i egn del malac da Covid à lascià l segn ence sun chesta usanza, ma te la maor pèrt di paijes de Fascia se à vedù gropes de picoi e gregn ciantores de la steila*



Trei Rees da Ciampedel e Fontanac te geija di Sènc Felip e Giacum.



Te geija de Cianacei per la benediscion l è ruà i Trei Rees da Cianacei.



Irati, Sara e Alessandro è jic stroz te la Val de sora.



I Trei Rees con la steila te geija de Moena.



N grop de Trei Rees gregn da Poza à ciantà te geija.



N auter grop de Trei Rees gregn da Poza i è jic sun Cèsa de Paussa e te Museo.



Luca, Nicolas, Arianna e Martin i se à enjignà con gran gaissa.

L temp de Pèsca Tofènia l è rich de tradicions, olache la religion e la fe se mesceida con cherdenzes magiches antiches de evenc soranaturèi e ric veiores che segna chel moment, dit de la Dodejsema net, leà al solstize da d'invern e che rua apontin 12 dis do l Nadèl.

La tradicions che amò anchecondi vegn portèda inant, amancol en pèrt, l è soraldut cheles che la Geija à tout su, fat sie e mudà per les leür a la religion catolica e a la fe. De autres les resta oramai demò ti libres o te la conties, desche chela de la besties che en vea de Pèsca Tofènia les se reiona: na cherdenza no demò ladina, ajache se pel la troèr te duta la Elpes, tel nord e ence ju per la Tèlia ensin te la Calabria. Te Fascia la è stata documentèda da Simon de Giulio tel liber Usanzas e lurgerdes da zacan, dat fora dal Istitut Cultural Ladin amò del 1983. L è stat anter la pruma publicacions del ICL, fata apontin per tegnir su la memoria de n passà che se no fossa jit destrabon.

Alò Simon Soraperra l conta percheche in vea de Pèsca Tofènia «i no jia nience più a dèr na vegèda del bistian jun stala, inant de jir a dormir.»

Oramai i è ben pec chi che jissa te stala, ajache apede la majons de Fascia stales no n è più, e nience tobiè, ma l rit de sciumentèr ogne stua e cambra l à endò ciapà mingol pe da canche te la parochies de noscia val i à tacà a dèr fora l incens, ensem con n sfoi che ge recorda o ge disc, a noscia jent e ai foresè, de la tradizion de jir te ogne cianton de la cèsa a sciumentèr per parèr demez i spiric catives e domaner la protezion del Segnoreddie, dant de scriver i signes col ses sun sèva de scr (v. ence l articol del Museo Ladin sun chest numer te l'attualità).

**Te nesc paijes se à vedù i Trei Rees, ma l è senester**

La tradizion di Trei Rees è stata tras portèda inant con gaissa ti paijes de Fascia. N muie de bec no veda l'ora de jir stroz per la cèses a tor su bonaman: i scioldi che i ciapèa jia a l misioncs, enveze bombi, pomarances e nojeles i podesa se i spartir. Ades i douces no l è più na gran atrazion per i bec, che i ne n ciapa teis: a fèr jir inant la tradizion l è soraldut la bona voa de vèlch mèr e pèr, giava o giaf che ge tegn e che met a la leta temp e impegn

per enjignèr guanc e steiles e per portèr stroz i bec e la bezes a ciantèr la bona noela del Messia nasciù.

Ence sun chesta tradizion l Covid à pesà, ajache jir fora per la cèses l era dovontà impossibol, ampo chest an te la maor pèrt di paijes de Fascia vèlch grop se à amò regolà, amancol per tor pèrt a la funzion te geija, portan inant chesta usanza che ge dèsc legrezza a picoi e gregn e a la jent de età.

**I Ciantores de la Steila te la Val de sora**

Pean via da tinsom la val, a Penia, Dèlba e Cianacei chest an a jir stroz regolè da Trei Rees l era i frèdes Sara e Alessandro Pezzei ensem con Irati Sissoko, fornii su da Fernanda Micheluzzi che da egn la se dèsc ju per didèr e regolèr i bec che vèl jir a fèr i Trei Rees. I à emparà la cianta per talian tradizionèla de la Val de sora «E noi siamo i tre Re Magi», i è jic te majons e hotie e i à tout su banamans per i bec de la Bielorrussia che amò padesc la consequenzes del dejaster nucleèr de Chernobyl. Ic è stac benedi da don Massimo, che da egn l vègn ta

che à portà inant la tradizion de Eleonora de Janoto e i à tout pèrt a la zerimonìa de la benediscion di bec e de l'adorazion del Bambin che don Mario à endrezà ence te geija di Sènc Felip e Giacum, col compagnament del Cor de geija. Ence chiò don Mario à contà la storia di Magi e chisc Trei Rees ge à sport n picol don a ogne bez.

**Che bel fèr i Trei Rees!**

Tel comun de Sèn Jan ence chest an se à podù scüter la bela ciantes di ciantores gregn che se à metù ensem del 2016, pean via dal grop di Bontemponi, e che enceben l Covid i à seghità a crescer. Chest an anter Rees e pèstres n era amancol na dejina, i è jic te vèlch majon a troèr la jent de età te, te vèlch hotel olache i è stac domané e dapò i à viventà i evenc del Comitaz Manifestazion dedant a la Cripeles te piazz. En vea de Pèsca Tofènia i se à spartit te doi gropes: trei Rees e n pèr de pèstres à tout pèrt a la messa te geija de Poza e etres trei coi pèstres è jic te la Cèsa de Paussa e te Museo Ladin. I à ciantà desvalvia cianties, chela con la musega tradizionèla de la Val de sot (Pera) e l test fascian adatà da la poeija de P. Frumentio e de autres per talian e ladin traslatèdes e adatèdes col didament del maester Stefano Lazzer.

La roba più bela l è che chest an i à abù ence n picol grop de 'ritadins': Luca Dell'Eva ensem con Arianna Talmon, Nicolas Detomas e Martin Dell'Eva, duc de seconda mesèna, i se à metù adum, i à emparà dai 'gregh' la cianta per fascian e una per talian e dai 2 ai 6 de jené i è jic stroz te la cèses de la jent cognosciuda a les ciantèr. Dut è nasciù da la gaissa de Luca, che jà da vèlch an l volea jir a fèr i Trei Rees e l se à endrezà, se sà ben con mingol de aiut da chi de cèsa: se auguron che chesta gaissa vae inant.

L di de Pèsca Tofènia domesdi chisc picoi Trei Rees à ciantà con gran braura ence te geija de Poza a la zebrazion per 'l'infanzia missionaria' ofizièda da don Andrea e compagnèda con de bela cianties dal Cor di bec de Pera vidà da Manuela Bernard. I bec à viventà la zebrazion con la letures, i è jic dedant utèr a onorèr l Bambin e a portèr la mojina con la bonamans per la misioncs al ben de duc i picioi che padesc tel mond, aldò del mot cernù per chel di: «La misionc se fèsc ensem.»

A Soraga, olache de solit l era doi gropes, chest an col didament de la catechistes l era stat endrezà trei bec, ma a la fin un no l à podù jir e dut è restà cet: se spera che n auter an la vae miec.

**Reines e Rees ence a Moena**

Ence a Moena i Trei Rees à tout pèrt, te geija de Sèn Vile, a la benediscion di bec l di de Pèsca Tofènia da la doos domesdi. Tel di de 'l'infanzia missionaria' don Gianni Damolin à tegnù na zebrazion pissèda per i bec, olache l à contà la storia di Magi e te la benediscion i Trei Rees co la steila i è ruè: Tiziano e Lucia Defrancesco e Mariachiara Ganz i à ciantà la cianzon tradizionèla che se à semper ciantà a Moena. Chesta cianta è stata ciantèda dapò ence dal Cor de geija de Moena te la messa de la sera, ofizièda da don Bruno, che l à volù ge portèr dant a moenac e foresc chesta bela tradizion, endèna che i bec, chest'outa col quant da servidores, i fajea jir entorn la steila lumenosa.

Lucia Gross